

JÚTAS

papin áarar akuptukma

Jútas Yus-shuaran papin áateawai

¹Wi Jútas Jakupu yachintjai. Jesukrístu takarin asan ashí Yus Apa ni shuari átinian achikma ainia nuna ju papin áateajai. Jesukrístujai tsaninkiaru ásaratai Yus nin wainiainiawai niijiai kanakchatniun. ²Yus ti waitnentramak imiatkinchanum tuke shiir pujustinian yainmakarti. Ti anenma asa túrati.

Ti tunáa shuar írunui (2 Pítiur 2.1-17)

³⁻⁴Aneamu yatsurú, iikia mai metek Yus-shuar asar ju uwempratin chichaman áatratniun wakerukjarme. Túrasha ti yajauch shuar anankramawar atumín pachiinkiarmai. Niisha “Yus ti anenkartin asamtai páchitsuk tunáa túramniatiji” tuiniawai. Nu arantcha Yus in Akuptamniuncha tura ii Uuntri Jesukrístuncha nakitin áiniawai. Nu asamtai nu shuaran “yaunchu sumamawaruiti” tímiayi Yus. Tuma asamtai tájarme “Tuke Yus-Chicham yapajiáshtinian ashí Yus-shuar akasmatkarat tusar susamuiti. Wátsek, kakaram ajastarum” tájarme.

⁵Yaunchu Uunt Yus Israer-shuaran túramia nu nékarme. Nuna atak enentáimtikratjarme. Ejiptu nunkanmaya júkiar Nin umirkacharua nuna máawarmiayi. ⁶Nayaimpinmaya suntarsha ni pujutairin ajapa ikiukiar Yus susamun umitsuk iniaisarmiayi. Túrawarmatai Yus kiritniunam jirujai tuke jiníá sepunam apujas pujurainiawai. Tura Uunt Tsawant jeamtai súmamtikiawartatui. ⁷Núnisan Sutuma péprusha Kumura péprusha tura tíjiuch péprusha áishmanjaisha nuwajaisha ti yajauch nuamtak tsanirmanainiakui ti tunaan penké túrachmin ana nunasha túrin áirmiayi. Túmainiakui ashí shuar ashamkarat tusa Yus amuicha jinium asutiáwarmiayi.

⁸Ayu. Atumín yajauch shuar ainia nu, yaunchu túrunamun enentáimtsuk tuke yajauch enentáimiainiak ni ayashin yajauch

awajmamainiawai, Yusnasha nakitiainiawai, tura ashí akupin ainia nunasha yajauch áujmatainiawai. ⁹Antsu Mikiar, nayaimpinmaya suntara kapitiántríntiat, iwianchjají máaniak Muisaisa ayashín akasmatak “áaniumsha” tu chicharkachmiayi. Antsu áyatik “Yus írmastí” tímiayi. ¹⁰Túrasha ju shuarka nékainiatsna nuna nánkamsar yajauch chicharainiawai. Tura nékainiana nuka yawá áinis enentáimtsuk áyatik nékainiawai. Tura nújajísha imia niníki yajauch emesmamainiawai.

¹¹Maa, aneartí. Kaíní yajauchin túramia núnis tura ásar jákartatui. Tura Parama áinis kuítian ti wakeruiniak imia niníki tunaanum tsan̄kamakaru áiniawai. Tura Kurea áinis ashí akupniun nakitin ániak kajin̄kiartatui. ¹²Átum nuamtak anenaitiai-jisat nájankurmin nu shuar chikichan enentáimtutsuk Yusnasha ashamsuk imia niníki enentáimtumainiawai. Pen̄ké ántar ániak yumi kíar tee ajasua núnin ániawai. Tura nase umpuim yútutsuk nan̄kamainiawai. Árak nerektin nantutin nerechua áanin ániawai. Tuma ásar uwemu pen̄ké jaka áanin ániawai. ¹³Entsa nujan̄krak saurín ajekeawai. Nu shuarsha núnisar ní natsantrín natsam̄tsuk ajekenawai. Tura yaa waakua áanin ániawai. Tuma ásar nekas kiritniunam tuke men̄kakatin ániawai.

¹⁴Atan̄ka tiran̄kíyayi Eruk. Ti pen̄ker Yúsnan etserin asa juna tímiayi “Uunt Yus ti untsurí ní shuaríjijají winittiawai. ¹⁵Nuyá ashí shuar túrawarman nekaattawai. Tura ashí yajauch shuarnasha ti tunáa túrawarua nujaí tura Yúsán yajauch áujmatsarua nújajísha súmamtikiawartatui” tímiayi Eruk. ¹⁶Nu shuarka pen̄kera nujaí waratsuk “yajauchiiti” tuiniawai. Aya ní ayashí wakeramunak wakeruiniawai. Nan̄kaamantu enentáimtumainiak chichainiawai. Tura chikich shuaran shiir chicharainiaksha aya ní wakera nuna túrutati tusa pen̄ker chichainiawai.

Yus-shuar enentáimtikratin

¹⁷Tura atumsha, aneamu yatsurú, ii Uuntrí Jesukrístu akatramurí yáunchu “aneartarum” tiarmiania nusha enentáimtustarum. ¹⁸“Amúamu tsawant ishichik ajatesmatai shuar Yúsnan wishikrar nakitrartatui. Tura ní yajauch wakeramuríniak umíi pujuartatui” tiarmiayi. ¹⁹Nu yajauch shuar atumín akantamenawai. Ju nun̄kanmayanak páchiniak Yusa Wakanín takakainiatsui.

²⁰Tura átumka, aneamu yatsurú, tuke Yus nekas enentáimtusurum kakaram ajastarum. Yusa Wakaní kakarmarijijají ashí Yus seatarum. ²¹Yus ti anenmakui ní wakera nu wakerukturum atumsha. Túrarum ní anenmamu shiir nekaattarme. Tsawant winiawai, ii Uuntrí Jesukrístu in waitnentrama asa tuke shiir Nijijají pujustinian amatatji. Nu tsawant naká pujutarum.

²²Mai yapají ajá ainia nu naka enentáimtikratarum. ²³Chíkich shuarsha jiniumiá júsatniua áitkiasrum uwemtikratarum. Tura chikichcha

ti yajauch ásarmatai anearum waitnentratarum. Tura ni pushirisha ni tunaarijiai maatra asantai mujkiatniuiti.

Yúsan shiir awajeawai

²⁴⁻²⁵Yus chikichkiiti. Ti nekaiti. In uwentikkiartin asa ni kakarmarijiai yainmakminiaiti tunaanum iniarchatniun. Tuma asa tunaajai máatrachu awajtamas ni ti shíirmarin ejetamtatrome. Túrutma ti waramtikramsattarme. Ii Uuntri Jesukrístu túrunamujai Yuska Niñki shiir awajsatniuiti tura nankaamantu enentáimtustiniaiti. Yáunchusha, yamaisha, tura tuke ashí akupin atí.

Núkete.